

ЗОЯ РОГОВА




КУИМ ЧОЙ

ошшо мек
от шнамови Яам

15.03.95г

Зоя Рогова

КУИМ ЧОЙ



Сыктывкар

Коми книжной издательство

1991

84 Ко
Р 59

Рогова З. И.
Р59 Куим чой: Висьтъяс, пьеса, кывбуръяс, нӧд-
кывъяс. — Сыктывкар: Коми книжнӧй издатель-
ство, 1991. — 56 л. б.

ISBN 5-7555-0335-4

Зоя Роговалӧн тайӧ медводдза книга. Ачыс авторыс чуж-
ліс да быдмис Придаш сиктън, уджаліс сиктса школаын
велӧдысьӧн. Ӧні сійӧ пенсия вылын.

Зоя Рогова гижӧ челядьлы сійӧм кывбуръяс, висьтъяс
да пьесаяс. Ӧткымын на пиысь петӧны тайӧ книгаын.

84 Ко

Р 4803310500-027 28-91 м
М 128 (03)-91

ISBN 5-7555-0335-4

© Рогова З. И., 1991.

ВИСЬТЪЯС

ТӨЛЫСЬ ВЫЛӨ

Вөліны войналөн сьёкыд лунъяс да войяс. Сашалөн да Володялөн батыныс көнкө өні ылын, фронт вылын. Кык вок олісны мамныскөд өти вөр лэдзан посёлокын. Мамныс лун-лун мыркис вөрын, а Саша да Володя пыр вөліны гортанысөсь, ворсісны ичөтик комнатаын.

Сашаөс школаө эз на босьтны. Ветліс эськө, но велөдысьыс шуис:

— Локтан мөд во. Таво ичөтджык на.

А Володя и ещө на дзоля.

Рытнас мам локтіс удж вылысь, пуис рок. Сөйисны няньтөг. Ужнайтігкежлө нормаа нянь эз кольывлы.

— Челядь, тарыт ветлам клубө концерт вылө, — шуис мамныс пызан вылысь дозмук идралігөн.

— О-о! Клубө! Мунам! Пыр жө пасьтасям! — радысла чеччалісны кык вок.

Вөрса клуб эз ыджыд вөв. Тырыс нин ызгисны йөз. Мам пуксис бөрья радө, а кык вок мунісны медводзас, сәні джоджас пукалісны челядь.

Концерт заводитчис. Первойөн сцена вылө петіс кузьтушаа дядьө, висьталіс вөрын удж мунөм йылысь, фронтывьса вьльторьяс йылысь. Сэсся велөдчысьяс лыддисны кывбурьяс,

йөктисны-сьылісны. Медся ёна Сашалы да Володялы съёлём выланыс воис «Тöлысьыввса ныв йылысь» съыланкыв. Съыліс сійöс мича сарапана тётя.

Нор съыланкывйын висътавсис сы йылысь, кызди ичотик нывкаöс увтыртис ичиныс, ёна уджодис, омöля вердис, войяснас ю дородз ыстывліс вала. И нэриник ныв норасис эзысьон пöртмасысь тöлысьлы аслас лёк олём вылө, вöзйысис, мед сійö коньöр нылöс босътас ас вылас. Тöлысь кыліс бöрдöмөн вöзйысьöмсö и босътис нывкаöс. И со öні на сійö сэні, тöлысь вылын, пельпом вылас карнан йылын ведра гоз — быттьökö ва катлө.

— Дядя Семён, — шыасис Саша улöс вылын пукалысь суседыс дінö, — мый нö сёйö нывкаыс тöлысь вылас?

— Еджыд нянь да кöлач! — кызкö зэв збыльысь артмис Семён дядьлөн шуöмыс.

— А кызди сэтчö кайнысö?

— Кызди? Войын, ва ведра гозйөн, — вочавидзис Семён да содтіс: — Тöлысьыд босъталö ас вылас сöмын сэтшöмьясöс, кодьяс ёна уджалöны, гортаныс отсасьöны мамыслы. И ещö найöс, кодьяс отсасьöны фронтлы, — а ачыс нюмъялöмөн видзöдис Саша вылө.

— А кызди фронтыслы отсавны?

— Тэ, пиук, велöдчысьяскöд öтвывтчы, чукöрт накöд кöрт торпыригъяс.

— Ставсö гөгөрвои, дядя Семён! — ярскöба шуис Саша да сэсся эз нин кут юасыны. Юрас сылөн пуис öти мöвп, кыз эськö кайны тöлысь вылө нывка дінö да пöттöдз сёйны еджыд нянь да кöлач.

Аскинас, кор мамыс муніс удж вылө, Саша ичөтджык вокыслы висъталіс мöвпыштöмтор йывсьыс:

— Кылан, Володя, вай ми нывкаыс моз каям тöлысь вылө!

— Каям! Меным окота жö сёйыштны кöлачсö да еджыд няньсö. — Володя тöрыт кывліс жö Семён дядьлысь висътасьöмсö, и öні тайö уси тöд вылас.

— Кывлін, Володя, төлысьыд өд оз на быдөнөс босьт? Ныв-каыс кутшөм ёна уджалөма. Ми ёна жө кутам уджавны, мамлы отсасыны, велөдчысьяскөд көрт торпыригыяс чукөртны. И фронтлы отсавны.

— А мый сийө фронтыс? — эз гөгөрво Володя.

— Папаяслы отсавны...

Сёр рыт нин вөлі, кор мамныс воис удж вылысь да пырөмөн тшөтш нимкодя шыясис:

— Аттьө, сё пасибө, бур пьян! Гөгөр дзим-дзурк, бура пелькөдчөмныд, дозмуктө мыськалөмныд и.

Сашалөн зэв кыпыд лои сьөлөм вылас: мамыс со кызди ошкис кык вокөс зильөмсьыныс. Тадз жө вермасны ошкыны найөс и көрт торпыриг чукөртөмысь.

Кык вок быд лун уджалісны-мошкоритчисны кызд-мый сяммисны, да виччысисны, кор петкөдчас югыд төлысь, медым вөзйысьыны да кайны сы вылө.

Со и өтчыд пуксис сэтшөм сэзь рытыс, енэжын югъяліс тыр төлысь. Мамныс, удж бөрас, муніс магазинө. Саша да Володя тэрмасьөмөн кутісны лөсьөдчыны төлысь вылө.

— Öдйөджык пасьтась, да шоныдджыка, — Саша ышмөдліс воксө. — Ме босьта ведраяссө. Мөдім!

Вокъяс петісны посводзө, эз на удитны воны порог сайө — паныд локтө мамныс. Саша да Володя сайөдчисны пемыд коридор пельөсө, но тайө эз отсав — мамныс аддзылөма и төдөма пьянсө:

— Сашук, Володя, ноко, петөй сэтысь. Кытчө нө нин мөдөдчинныд войнас?

Кыліс ведра вугйөн гольөдчөм. Мам матыстчис пельөслань, кутіс Сашаөс киөдыс, петкөдіс төлысь югөр улө:

— Тэ, пиө, мый, кытчө мөдөдчин? Ведраяса?

— Ме... ми... вала...

— Талун кежлө эм на ваыс, аски ачым вая.

— Ме вая... ми ваям... Володякөд, — нетшкысис мам кыысь

Саша.

— Некытчö он мунöй, пырöй гортö, кад узыны! — стрöга шуалис мамныс. Сэсся кыкнаннысö киясöдныс кутöмөн пыртöдiс гортас.

Саша да Володя дыркодь бöрдiсны гусьöникөн.

МАМЛЫ КОЗИН

Ичöтик Ваня листалис календарь. Март көкъямысöд лунöдз воис да дугдiс листавнысö.

— Нывбабаяслөн Международнöй лун! — гораа лыддис зонка, медым батыс тшöтш тöдiс.

— Праздник, пиöй, — дзык пыр шыасис батыс. — Мамыдлы да чойыдлы козин колö.

— А мый эськö козин вылас ньöбны? — збоя юалис Ваня.

— Мый вылö ньöбан? — юалöмөн вочавидзис бать. — Тэ öд сьöмсö он на босьт.

Чöv олыштiсны батя-пия. Сэсся бать мелiа пуктiс кисö пиыслөн пельпом вылö:

— Мамыдлы тэсянь медся дона козиннас лöö бура велöдчöм. А чойыдлы мыйкö серпасав, тэ öд художник.

Бать сетiс пиыслы виль альбом да ёсьтытöм на карандашъяс. Дас кык карандаш: став рöмъясөн пöртмасысь öш-камöшка позяс рисуйтны!..

Карандашъяссö ёсьталöм бöрын Ваня вель дыр мöвпалис: «Мый эськö рисуйтны?» Рытивбыд майшасис — нинöм эз рисуйт.

Вель дыр жуглис юрсö мöд луннас. Радио отсалис!.. Нималысь артистка Валентина Есева сыылис «Шондiöй, мамöй!»

— Мамыд тай шондi вöлöма! — ловзис ичöтик Вань. Зэв öдiö рисуйтiс лöз енэж да югöръяс койысь гöрд шондi. Серпас

улас гижис: «Тайö — дона мамöй, став гортсаяслы сетö гаж, югыд да шоныдлун». Татшöм мелі кывъяссö Ванялы унаысь шульвліс бабыс.

Мöд листö Ванюк рисуйтіс дзоридз. Сы улö гижис: «Тайö — чоюк». Татшöм кывйöн мамыс ошкывліс Ванялысь чойсö.

Кöть праздникыс бабъяслөн, мамъяслөн да чойяслөн, Ваня рисуйтіс и батьсö да асьсö.

Дзоридзкöд орччөн сійö серпасалис джуджыд да пашкыр кыз пу. «Тайö — батьö», — шуис Ваньö. Сэссия тайö жö листö рисуйтіс ичöтик лэбачöс. Мый вöсна эськö? Чойыс Ваньлы частö шульвліс: «Бордъясьысь лэбачпи моз котралан да чеччалан...»

БИНОКЛЬ

Андрейлы вöлі кökъямыс арöс, кор батыс муніс фронт вылö.

— Ме пыдди колян, — малалис бать детинкалысь еджыд юрсисö. — Кывзысь мамыдлысь, чойтö эн кедзовт.

— Ог сэссия кут нетшкыны кöсаöдыс, — кöсийысис Андрей. — Тэ сöмын локтігад меным бинокль вай. Война вылад öд сійö уна.

— Вая-вая, — кöсийысис батыс.

— А кор локтан? — меліа видзöдліс улисянь батысслы синмас Андрей.

— Регыд, дона пи, регыд. Вермам лөк вөрөгöс, и гортö. Андрей быдөнлы ошйысис сиктын, кутшöм козин кöсийысь-öма сылы батыс.

Колис сэсянь куим во. А батыс век оз лок, оз вай кöсийысьöмторсö.

Первойя кадас тшöкыда воывлісны письмöяс. Мамыс зэв кыпыдпырысь восьтыліс найöс. А öти письмö мамыс шогпырысь

босьтис киас. Сы бõрын сәсся почтальонша эз кут кежавлыны на ордõ. Усьõма батыс фашистъяскõд чорыд косьын.

Андрей мый вермис отсасис колхозлы. Первойсõ юр кыскалис, а коймõд гождõмнас куртны да ытшкыны нин велалис.

Войналõн нельõд тулысын воис фронт вылысь Ивõ Прокõ. Чотис, õти кок пõвсõ гõгрõс пуысь вõчõмаõсь. Армияõ мунтõдз сийõ колхозын юралысьõн вõли, а мыйõн воис, бара важ уджас кутчысис.

Видзьяс вылõ петан кад воис, шуисны котыртны торъя бригада, кодлы вõли индõма пуктыны турунсõ Гагшор йылын. Кызвыннас ылыс участокõ õкмис челядюлов. Сэтчõ жõ сюртчис и Андрей.

Андрей куртис. Сетисны аслыс вõв да куртан машина дõзбõритны. Ёркыд тõвруа лунъяснад дивъя гижлавны шыльыд видзьастõ. Тырас кос турунõн машина гыркыс, да личкыштан кокнад рычаг вылас, став кинад отсыштан помõдз пиньяссõ ләптыштны. А кымõра лунъяснас матõ волан, лõддзыс вõвтõ вильõдõ, гебйыс синмõ сатшкысьõ. Кузь каднад Андрей век жõ велалыштис кутшõмакõ на динõ.

Сэтшõм здукъясьõ, кор видз вылõ волõ председатель, челядь чукõртчылõны тшынас дорõ.

— Зильõй, зильõй, том войтыр, — ышõдõ Ивõ Прокõ. — Уна турун заптам — мõсьяс пõtõса тõвъясны. — Здук кежлõ чõв усьлõ, сәсся содтõ: — Ноябрьскõй праздникяс дырйи ставныдлы кознынала ситеч дõрõм да сатин гач.

Андрей синсõ эз ләдзлыв председательлõн бокас õшалысь бинокль вылысь.

— Мый? Кажитчõ?

— Зәв ёна, — гõрдõдис Андрей. — Позьõ видлыны?

Андрей вель дыр бергõдлис киас õтарланьõ вõснялысь трубасõ. õтилати весиг нюкыльтчыштõма, осколок либõ пуля, кõнкõ, чирснитõма. Видзõдлис ты мõдарõ, дзик ныр улас эжõр костас уткапаян уялисны. Вот дивõ! Дзик мойдын моз, тә аддзан, а тәнõ — оз. Но и добра!

— Бать татшөмөс жө көсийсыліс вайны, — ышловзис Андрей да мыгчис бинокльсө Прокө дядьлы.

Арнас Гөрд Октябрь праздник водзвылын пелькөдөм-мичмөдөм школаө локтісны председатель да тшөтовод, мездор тыр вайисны челядьлы козинъяс. Өтияслы — мича дөрөм, мөдъяслы — лыжи, коймөдъяслы — книга.

Андрейөс чукөстісны жө пызан дөрө.

Председатель, Ивө Прокө, лышкыда нюммунис, сэсся и мыгчис зонкалы кутшөмкө көрөб.

— Мый нө тани? — Андрейлөн пышкай моз жбыркнитіс сьөлөмыс.

— Восьты да видзөдлы, — вашъялө председатель.

Андрей тірзыштысь киясөн восьтіс.

— Бинокль! — ылькнитчысь радлунөн горөдіс шемөсмөм Андрей. — Тайө меным али мый, Прокө дядь?..

— Тэныд, дерт, коды нө сэсся, — шуис председатель. — Зонкаяс пөвстысь тэ медбура уджалін видз вылын. Молодеч!

— Прокө дядь, ме сөмын некымын лун... Өти вежон, гашкө, новла... И бөр аслыныд бинокльсө сета. Тіян вед тайө.

— Бөр эн вай, — сьөлөмсянныс шуис председатель. — Вөдитчы и казътыв батьтө. Бур морт сійө вөлі: зіля уджаліс колхозын, смела тышкасис фронт вылын.

КУИМ ЧОЙ

Урокъяс бөрын Мария Ивановналы, коймөд классын велөдысьлы, паныдасис Нина Лыткиналөн мамыс да вель дыр норасис нылыс вылө. Ньөти пө оз кывзысь, асныралө, гортын оз отсась. Ті көть пө, Мария Ивановна, отсыштөй кызкө, тіян дінын өд нывкаыс велөдчө.

Дзугыльмис Мария Ивановна, а сэсса рытивбыд думайтис аслас велөдчысыя йылысь. И уна мукөд нелючкияс на казяліс сійө: өти омөля велөдчө, мөд со талун пөим чукөртанинысь пыш-йис, коймөд дневниксыыс оцєнкаяссө вежлалөма...

А өд быттө ставыс тырмө челядыслы: сөян и юан, көм и паськөм, книга и тетрадь. Сөмын велөдчы...

Аскинас рөднөй кыв урок вылын Мария Ивановна лыддис война кадся олөм йылысь кывбур. И кор казяліс, мый челядь сьөлөмсяньныс кывзөны, содтис:

— Көсьянный кө, ме нөшта на висьталышта тиянлы сөкся олөм йывсыыс. Ме сөки буретш тиян кодь арлыдаөн жө вөвлі...

— Висьталөй, Мария Ивановна, висьталөй! — горөдісны челядь.

— Öти сиктын мамныскөд олісны куим чой, батыныс вөлі фронт вылын, — заводитис небыд гөлөсөн учительница. — Олісны омөля, трудоденьяс вылө нянь юклісны этша, эз тырмыв сійө, и мам асьыс пайсө век вичмөдлывліс челядыслы. Тшыгьялөм-ла да сьөкыд уджла мам өна висьмис. Öти рытө сійө корис куим чойөс аслас вольпась дорө дай шуө:

— Дзыкөдз тай ме висьми, кагаясөй... Мыйкө кө мекөд лоө, гортысь некытчө энө мунөй, өтлаын кызкө олөй... А сөс-ся регыд батыныд воас фронт вылысь...

Куим чой пукалісны да бөрдісны мам вольпась дорын — ичөтикөсь, жебиникөсь. Медыджыдыслы вөлі сөмын на дас арөс, и ті моз жө велөдчис коймөд классын.

Недыр мысти мамныс кувсис. Локтисны сельсөветсянь, медым мөдөдны челядьөс детдомө.

— Ми некытчө гортысь огө мунө, — шуисны чойяс.

— Кыз он мунөй? — чуймис сельсөветса юралысь. — Код нө кутас видзны тиянөс? Вердны да юктавны?

— Асьным, — водзө пыксьөны чойяс. — Ми кутам овны гортын. Мам кулігас корис гортнымөс не эновтны!

Овны кутісны куим чой ас кежаныс. Луннас ветлөны школаө, велөдчөны ставныс зөв бура. Урокьяс бөрын став

школаөн частö ветлісны чукöртны пöим, кöрта кöлуй, мед сыысь выль танкъяс вöчисны да öдйöджык нин пасьвартісны вөрöгöс... Пöшти быд асыв ломтывлісны ыджыд пач, медем пöжалыштны картупельысь сöчөнъяс. Сьöкыдырысь ломзыліс пачыс, подійс кузь, зырийөн оз судзны пессö сюявны да и эбöсныс абу. Медся ичöt чойлы ковмывліс быд пöрийö пыравлыны пач пытшкö, бура тэчны сэнi пессö, ломзьöдны и öдйö бөр петны, медем не пöдны тшын пиас.

А кызди помасис школаын велöдчан во, петісны куим чой колхознöй уджъяс вылö. Град йöрын киськалісны пуктасъяс, весалісны йөнъясысь, видз вылö ветлісны куртны турун.

Öтчыд видз вылысь локтöм бöрын аддзисны почта кудійысь письмö. Сэнi юөртісны, мый фронт вылын геройскöя пöгибнитіс батыныс...

Мария Ивановна чöv усис, сьöкыда ышловзис. Классын вöлі шы ни тöv.

— Мария Ивановна, а мый водзö лои челядыскöд? — друг юаліс Нина Лыткина. — Эз кувны найö?

— Эз кувны. Олісны, быдмисны и велöдчисны. Куим чой пиысь öтиыс, Машö нима, со тiян водзын сулалö.

Челядь шöйöвошисны, эз тöдны мый и шуны. Медбöрын сійö жö Нинаыс зэв пöся шыасис:

— Со кутшöмöсь тi вөлöмныд! А ми немтор эг и тöдöй...

— Быд морт, ёна кö кöсийö, винёлөн овлö, став сьöкыдлунсö вермö венны, — помаліс учительница.

БУКЕТ

Воис тулыс, Митялөн мамыс öшинь ув йöрын лöсьöдіс градъяс, гөтöвитіс кöйдысъяс, пуктіс град вылö лук, морковь, свеклö.

А Митя котраліс мамыс дорын.

— Митя, тайö град помсö ог пукты, а коля тэн.

Митя чуймис, весиг котравнысö дугдіс.

— Мама, мыйла мем сійö градйыс?

— А тэ татчö быдты дзоридзьяс. Уна пölösös, мичаясös.

— Мыйла мем дзоридзьясыс?

— Кызди мыйла? Тэныд ковмасны дзоридзьясыд. Тэ жö, Митя, таво сентябрь первой лунö мунан школаö, велöдчыны первой классö. Первойысь школаö мунигөн быдөнлы колö букет. Сентябрь сійö луныс тиянлы кыз ыджыд празник. Ставыс школаö сэк мунöны букетъясөн-дзоридзьясөн. И тайö град помас ми кöдзам дзоридз кöйдысьяс. А тэ, Митя, кутан дзоридзьяссö быдтыны-дöзьöритны, весавны, ваён киськавны. Школаад мунан аслад быдтöм букетөн.

— Мама, вай öдйöнджык кöдзам дзоридз кöйдысьястö, — и Митя радлігтыр заводитіс отсасьны мамыслы.

Детинка гожöмбыд дöзьöритіс дзоридзьяс, весйис ёг туруньяс, частö киськавліс ваён, небзьöдіс мусö.

А дзоридзьясыс кутшöм мичаöсь быдмисны, ветлысь-мунысьяс пыр радлісны Митялөн öшинювса дзоридзьяс вылö.

Воис школаö мунан лун.

Митя да мамыс вöчисны дзоридзьясысь мича букет.

— Мама, кыкös вöчам букеттö.

— А кодлы мöдсö? — юалö мамыс.

— Вася тожö муно школаö первой классö, а сійö дзоридзьяссö эз быдты.

— Но ладнö, вöчам кыкös.

Мöд букетсö сетісны Васялы и радпырысь кык друг мунысьны школаö. Первой классö.

СЬӦД СЕРА КУКАНЬ

Ӧтчыд төвся рытын Коля вӧлі аслас жырыын вӧчӧ урокъяс. Пукалӧ, решитӧ задача. И кухнясянь кыліс мамыслӧн гӧлӧс:

— Бать-мам собрание вылын Колялӧн класснӧй руководительыс, Анна Ивановна, кӧсйысис гоҗся каникульяс дырйи найӧс, кодӧ бура велӧдчӧ, нуӧдлыны карӧ экскурсия вылӧ.

— Миян Колялӧн эмӧсь тройкаяс, оз кӧ кут бура велӧдчыны, экскурсия вылад оз и босьтны, — вочавидзис бать.

Коля кыліс тайӧ сёрнитӧ.

— Карӧ нуласны бура велӧдчысьясӧс?.. А ме кӧсья жӧ ветлыны карас. Ме некор на карас эг волев. Бырӧда тройкаясӧс. Ме ӧд верма, кӧсья кӧ.

И Коля ас водзас пунктис мог: велӧдчыны сӧдз, медым ёртъясыскӧд ветлыны карӧ экскурсия вылӧ.

Воны кутис тулыс. Ывла выв сӧдзи и кыскӧ челядьӧс ворсны. А Коля пыр, кытчӧдз оз эштӧд гортса уджъяс да кытчӧдз оз отсышт мамыслы горт гӧгӧр уджъяс вӧчны, ывлаӧ ворсны оз пет.

Бать-мам радлісны, мый Коля и велӧдчыны бура кутис и горт гӧгӧр отсасьны вевъялӧ.

Школаын медбӧръя звӧнок. Учительница Анна Ивановна сеталис табельяс. Кор Колялы кутис сетны табельсӧ, шуис, молодец пӧ. Осипов Коля, во заводитчигӧн вӧлі слабиникӧн, а во помалис бурьяс лыдын. Коляӧс пӧ тожӧ карӧ экскурсия вылӧ нуӧдлам.

Колялӧн радысла зэв частӧ заводитліс сьӧлӧмыс чеччавны, гусьӧн мӧвпалис: «Карӧ, ме карӧ ветла, быдтор аддзыла. Ок кутшӧм бур! Мед эськӧн ӧдйӧнджык!»

Гортӧ школасянь Коля локтис котӧрӧн.

— Мама, мам, ме бурьяс лыдын, вуджи нельӧд классӧ, видзӧдлы табельӧс, — и радпырысь чургӧдіс мамыслы асьыс

табельсö. — Мама, миянöс регыд нуласны карö экскурсия вылö, видзöдлам музей, волас пö цирк, быдтор аддзылам, теплоходöн мунам. А нуöны толькö бура велöдчысьясöс. И менö тшöтш. Анна Ивановна менö шуис молодечöн.

— Бур, зэв бур, дона пиук. Ме тожö молодечöн шуа, — и мамыс кутлыштис писö. — Ветлан карö. Ме тэныд карад мунігкежлö ньöба выль костюм, и сьöм сета сёйныд, мороженöй вылö, и ещö аслыд мый колö ньöбан карсьяс.

Отчыд гоҗся лунö котөрөн локтис Колялөн другыс Ваня:

— Коля, Коль! Öдйöнджык школаö котөртам. Анна Ивановна чукöртö. Аски пö карö теплоходöн мунам, экскурсия вылö.

Школаö кор ставыс чукөрмис, Анна Ивановна висьталіс:

— Аски нель час рыт кежлö ставныд чукөртчöй школа дорö, карö мунöм вылö. Босьтöй аскöдныд сьöм, сэн кутам сёйны столövöйын.

Челядь ызгисны, ставныс мыйкö висьталісны-радлісны.

Мöд луннас мамыс Колялы ставсö лöсьöдіс: выль костюм, мича дөрöм, выль ботинки.

Мам мунöм бöрын Коля бура майтөгөн мыссис, котөртліс другьясас, ичöt чойыскöд ворсыштис, рытладор пасьтасис — ставсö выльöс кышаліс да кымынысь ветліс зеркалö дорö видзöдлыны ас вылас. А мам век абу... и оз лок.

Нель часын школа дорын вöліны нин ставыс.

— Но, быдөн гөтовöсь мунöм вылö, сьöмтö быдөн босьтін-ныд? — юасис учительница.

— Ок, а менам сьöмыд и абу, мама көсіис и эз на во удж вывсьяс. — Коля места вылас эз öшыы. — Анна Ивановна, ме котөртла гортö, öні, гашкö, мама гортын нин. Ті мунöй, ме суöда.

— Ладнö, ми мунам. Тэ толькö, Коля, öдйöнджык суöd миянöс, — вочавидзис учительница.

Мöдöдчисны чукөрөн пристаньö, Эжва дорлань. А Коля гортланыс, да гортыс ылын вöлі школасянь.

Мам гортын нин виччысис писö.

— Коля, тэ мунöмыд нин? На сьöмыд, мун öдийö суöd. А ылынöсь кө нин, Коля, тэ видз вьвтiыс весьтасав, ты помтiыс, сэни эм векньыдик туй и котöрттöг веськыд туйöдыс тэ найöс суан, — велöдiс мам. — Но мун, бур туй! — мамыс кутыштлiс Коляöс. — Мен удж вылö на ветлыны колö.

Сикт помын гöра йивсянь Коля аддзис мунысь челядь чукöрöс, но ылынкодь нин вöлины. «Но ладнö, ме муна веськыда, ты помтi». И кежис векньыдик трöпинка вылö.

Ты помын бьдмис кузь эжөр турун и вöли вутшкöсь. Коля чеччалiс вутшкысь вутшкö.

— М-м-м, — друг кылiс ымзöм шы.

Коля повзис, сувтiс, гөгөр видзöдлiс, матын некод абу, некод оз тыдав.

— М-м-м... — бара дзик матын, Коля дорын, эжөр пöвстын кылiс ымзöм шы.

— Мый тайö, кодi тани?.. — и мöдiс сюся видзöдны гөгөр.

Ты помын, эжөр пöвстын, мыйкö вöрис. Коля вутшкысь вутшкö чеччалöмөн матыстчис... Кукань!.. Сьöd сера кукань!.. Вöйöма нюйтас, кынöмöдзыс пырöма, кайныс оз вермы. «Кыз тайö татчö воис?»

Коля гөгөр видзöдлiс и аддзис: ылын Эжва берег дорын тыдалiс куканьяслөн стада. Коля гөгөрвоис: навернö, пастукыс татi матiтi нуöдiс стадасö, и вот тайö сьöd сера куканьыс коли, а кукань видзысьыс эз казьяв уна пöвстсьыд.

— М-м-м... — ымзiс кукань, корис отсöг Колялысь, ас ногыс, навернö, тшöктiс лэптыны, отсавны, спаситны.

Сьöd сера кукань видзöдiс Коля вылö синваён тырём синьяснас, синваыс визувтiс бан пасьятыс.

Колялы лои жаль куканьыс. Заводитлiс лэптыны и некыдз эз вермы.

— Эновта, муна, вötöда ёртьясöс. Мем колö мунны карö, теплоход вылö.

— М-м-м... — ымзiс и бöрдiс кукань и корис ас ногыс отсöг.

Коля зэв унаысь видзёдліс Эжвалань: вот-вот воас теплоход, сетас гудок. А сьёд сера кукань, нырсё лэптыштёмён, зэв нораа да кузя ымёстис, Колялы синмас видзёдёмён, быттьо кёсийс шуны:

— Эн коль менё, лэпты менё, спасит менё, эновтан кё, ме татчё кула.

Коля кар йылысь вунёдіс и кутіс зэв яра лыбёдны кукань-ёс, но коть кыз мырсис, некыз оз вермы.

Котёртліс зорёд дорё, вайис кык потш, потшъяснад дыр мырсём бёрын куканьтё лэптис, а сійё весигтё и кок йылас оз сувт, кымёма, тыдалё, ёна мучитчёма.

Ы-ы-ы-ы... — юрётіс Эжва дорсянь теплоходлөн сирена шы.

Коля дрөгнитіс: «Теплоход воис!.. А ме... ме коли, коть и котёрта, ог су, пристаньёдз зэв на ылын».

— М-м-м,— ымзіс потшъяс вылын куйлысь кукань.

Коля шемёса сулаліс кукань дорын и вёлись аддзис виль костюмсьыс и ботинкисьыс виялысь нюйт да няйт сора ва.

Мый вёчны? Заводитліс Коля кыскыны потшнас куканьсё и оз вермы, некыз оз вермы.

— Тэ тан куйлышт, донаёй,— малаліс сьёд сера куканьёс Коля. — Ме котёртла сиктё и тэнё нуам вёлён, телега вылын.

И котөрөн детинка мёдёдчис сиктлань.

БА-БЕ-Е

Пёрысьмыны кутіс Марья баблөн Марта нима кёзаыс, коді дас во чёж вердіс сійёс чёскыд йёлён. «Колё мамыс кодьёс жё вежом вылё быдтыны»,— мёвпаліс баб, кодыр тулысладор Марта козьналіс куим ичотик пиянёс. Эныс вёлі сёмын оти и сійё зэв

нэриник да косіник, содтөд войнас гидас төкөтөё абу гегдөма, кок йылас оз сувт ни нёнясьны оз путьмы.

Марья баб еджыд көзапиөс кагаөс моз топөдіс морөс бердас да пыртіс керкаө, шыльөдіс-мольөдіс, пөляліс ныр-вомас. И со ловзыны мөдіс, меліалөмыд, буракө, быдөнны эбөссө содтө. Виль олысьөс бабө нимтіс Розаөн, лөсьөдіс резинөвөй нёнь да ичөтик бутылкаысь вердіс йөлөн. Ловзян нянь моз Роза мөдіс туны-быдмыны, лунысь-лун збоймис да шыляліс, еджыд пасьыс лөставны кутіс. Быдлаө чечыштө Роза: койка вылө и пызан вылө. Өтчыд весиг, кодыр бабыс эз вөв гортас, вөлі пыравлөма пач пытшкө, ёна и пуртікасьөма пөим пиас.

Марья баб воис гортас да зэв ёна повзис, еджыд көза пыдди керкаөд котраліс сьөд. Эз-ө кодкө Розаөс веж? Но бурджыка видзөдліс да гөгөрвоис помкасө.

— Но и быдтас, но и кывзысьтөм рөд,— норасис баб Розаөс тазыын мыськалігөн. — Вєськалін кө өд, йөюк, пөсь шыд чугунас, сэні пусин.

Воис шондіа тулыс. Вежөдіс керкадорса луд. Марья баб, Марта да Роза петісны ывла вылө гожйөдчыны. Ок и гажа жө пөра тулысыд! Көзапи кольмис чөскыд сынөдсьыс, ризьялө-котралө, пөтны оз вермы. Өдөбсяс Роза да лыйыштас кытчө вєськалө, швачкысяс плешнас потшөсө, видзөдө — потшөсыс дзонь и плешкыс абу потөма — шензынысө оз вермы. Рад! Сэссия бара вильысь шковгас, дурө, кытчөдз юрыс оз висьмы. Сэссия заводитіс вөтлысьны туй кузя мунысь-локтысьяс бөрся да дэльөдчыны кычияскөд. Паныдасис пашкыр гөна ыджыд пон, уськөдчис сы бөрся.

— Ав-ав,— петкөдліс Розалы ёсь пиньяссө пон, повзис көзапи, баблы сарапан улө дзебсис.

— Йөюк, төд кодкөд ворснытө,— малаліс юрөдыс да велөдіс баб.

Роза первойысь на лэччис шор дорө, кыдзи аддзис волялысь веркөса лөнь тыкөлаөс, вєськыда нем думышттөг чечыштіс сэтчө, чайтіс исковтны шыльыдінтіыс мөдарас. Сы пыдди юр выв-

тыс бузгысис кӧдзид ваӧ. Кыпаліс да мӧдіс тӑрыба шенасьны кокъяснас, первойсӧ Роза вӧлі сӧмын места вылас кытшлалӧ, сӑсса ладмис да берегас уйис.

Пыркнитчис Роза, йирышталіс веж турун сіяс, куйлыштіс шонді водзын, бара лысьсӧмыс кутіс гияльны. Керъяс кузя тшолкӧдіс-ветлӧдліс, статьялунсӧ лӧсьӧдіс, сӑсса мӧдіс потшӧс вылӧ кавшасьны. Ок, сьӧкыд «гимнастика» вӧлӧма, сӑсыс турбыльтчыліс. Видзӧдӧ, ӧтилаті майӧгъясыс чашмунӧмаӧсь, ачыс корӧ, чечыштны тшӧктӧ. Лыйыштіс. Неуна сорсьыштіс, кӧзапилӧн морӧсыс эз тӧр, сьылісӧ жмитіс, кокъясыс муӧдз эз воны, ӧшійис. Тадзи жӧ кымын Марья баб джодж мыськан ветьӧксӧ быгӧдлӧ.

— Бе-бе,— горӧдіс Роза. Дінтыс бергаліс повзьӧм Марта мамыс, но отсавны эз путьмы.

— Ба-бе, ба-бе-е! — мӧдіс чарзыны шӧйӧвошӧм кӧзапи.

Кыліс Марья баб Розалысь норасьӧмсӧ, локтіс да мездіс.

Тадзи Роза велаліс варчыны да видзчысьны скӧр понъясыс да баксӧмӧн чуксавны кӧзяйкасӧ, кор веськалас дзескыдінӧ. Ӧні на зӑв шаня олӧны кӧза да Марья баб.

ВУРСЬЫСЬ

Танялӧн ыджид чойыс, Маша, кужис вурсьыны. Танялы окота жӧ лои вурсьынысӧ, да кутіс Маша дорын зыньгыны:

— Вай ме вурся жӧ, ме ӧд мичаа кута.

— Зӑв на ичӧт, быдман да сӑки вурсьы, — стрӧга вочавидзис Маша.

Но Таня эз лӧдзчысь. Сӑки Маша сетіс ичӧт чойыслы ситеч тор. Емӧ пысалісны сунис, и Таня зӑв радпырысь кутчысис удж бердӧ. Недыр вурсьӧм мысти Таня казяліс, мый емыс абу.

— Емӧй кытчӧкӧ воши, — няргыштіс Таня.

— Корсь, воштін кө.

Таня быдлаысь корсис, но ем эз сюр. Ковмис Машалы эновтны вурсянсö да тшöтш корсьысьны.

— Бытьö ваö вöйи, — джджтї уялїгтыр шуалїс Маша. — Эн-ö нин ньылышт? Вомад босьтлїн?

— Босьтлї.

— Голяыд доймö?

— Доймö.

— Сїдзкö, ньылыштїн. Öнї кулан.

Таня заводитїс лимзавны. Бördїгтыр юалїс:

— Мый нö сэссия лоö, збыльысь кула али мый?

Бördöм шы вылö кухняысь локтїс мамыс.

— Мый лои, мый бöрдан, Таня?

— Мамö, ме кула, ме ньылыштї ем. Ма-а-мук-ö-öй!

Кöть кыз мамыс эз такöд Таняöс, сїйö век горзїс:

! Мамö-ö! Мамук!

Мам и ачыс тшöтш повзис, но век жö эз эскы, мый Таня збыльысь ньылыштїс емсö. Бара на быдлаысь корсисны, но весьшöрö.

Кор мамыс сыркъялысь Таняöс босьтїс мездорас да морöс бердас топöдїс, Таня мыйыськö друг ойöстїс. Видзöдлїсны, а емыс Таня партук зептысь чурвидзö.

— Ок тэ, вурсьысь, вурсьысь, — сöмын и шуис мамыс.

САМОЛЁТ ДА МОРТ

Коля велöдчис первой классын.

— Со кутшöм мича самолёт ме кужа рисуйтны! Аддзан, и пропеллер, и звезда.

Öтчыд урок бöрын Коля юалїс аслас класса ёртыслысь,

Шуриклысь, кужö оз сійö рисуйтны самолёт. А ачыс пыр жö пуксис, босьтис бумага лист да кутис рисуйтны быд лунья рисуйтанторсö.

Енэжын сявкйö-койö югöрьяссö шондi. Сыкöд орччөн лэбö самолёт: пропеллера, звездаа, аслас номера.

— Прамой самолёт кодь, — ошкис Шурик. — А ме со мый кужа рисуйтны.

И сэн жö Шурик рисуйтис мортöс, да сэтшöм лöсьыда, весиг Коля дыр шензис.

— А ме мортсö ог куж рисуйтны, — жугыльпырысь шуис Коля.

Та бöрын Коля некодлы нин эз ошйысьлы, мый кужö бура рисуйтчыны.

КАТЯЛÖН ОТПУСК

Бабыс ордö гөститны воис Катя внучкаыс. Керкаö пырöмөн тшöтш Катя пöся кутлис да окалис бабсö.

— Ме локтi дзонь тöлысь кежлö, «отпускö».

— Зэв бур, мый воин, — нюмъялис бабыс. — Кыдзи, Катенька, помалін первоу класстö? — юасис баб.

— Зэв бура. Школасянь мамöс аттьöалисны, мый ме отличница, — ошйысис Катя. — А ме вöли классын командирөн.

Мöд асывнас баб дорö пырис бригадир.

— Анна тьöt, он-ö ветлöй капуста град вылысь ёг турун нетшкыны?

— Аттö дивö, менам карса гөстя, да кытчö нö сійöс коля öтнассö.

— Босът аскöдыд.

— Ладнö, нуöдла и эм. Катюша! — чукöстис бабыс внуч-касö. — Ёг турун нетшкыны корöны, а кытчö ме тэнö коля?

— А ме ветла жö.

Бригадир быдöнлы индис торъя радъяс.

— А тайö, Анна тьöt, тиянлы кык выlö. Мыйöн эштас, верманныд мунны.

— Катя, сöмын капустасö эн вөрзьöд, — велöдис бабыс.

Катя зэв зиля заводитис уджавны. Пажын кежлö индöм радъясыс весассисны да содтöд на öти рад весалисны. Рытнас Катя азыма сёйис яя шыд тасыти да блюд тыр рок.

— Бабö, зэв жö нин чöскыд тэнад сёяныд...

— Сёй, дитя, сёй.

— Аски бара ветлам ёгсö нетшкыны, — вöзйысис Катя.

Ассыыс «отпусксö» Катя коллялис зэв гажаа. Бабыслысь став градсö весалис. А дядьыс весиг трактор выlö пуксьöд-лис, öтлаын гöрисны. Виль пöдругаясыскöд ветлывлис купайтчыны.

Катя зэв бура кужис йöктыны, и кор клубын лоис концерт, сийöс корисны выступайтны. Ёна и клопайтисны! А клубса заведующöй бура йöктöмысь Катялы кöсаас кöрталис еджыд бантик дорö алöй бантик да сетис мича книга.

Тöлысь бöрын, кор Катяла воис мамыс, медым нуöдны бөр гортас, карö, Катя шуис:

— Мама, ме ог на мун, менам öд отпускöй эз на помась.

— Ов, сідзкö, дона нылöй, отпускав водзö, — шуис мамыс.

КÖЧ НЯНЬ

Коля ичöt на, но ыждавнытö кужö нин. Пуксяс сёйны, да немтор сылы оз шогмы, немтор оз кажитчы.

- Колюк, гашкө, яя шыд панялыштан? — юалө бабыс.
- Ог көсйы! — дузьялө мөдыс.
- Либө еджыд нянь йөлөн сёйышт, — шуө мамыс.
- Ог!
- Гашкө, көлачөн чай юан?
- Ог көсйы!

Тайө сёрнисө кыліс Колялөн батыс, коді буретш вөлі локтөма удж вылысь.

- Коля, а сёйин-ө тэ эськө көч нянь? — юалис сійө.
- Көч нянь? А кутшөм сійө? — эз гөгөрво Коля.
- Став няньсьыс чөскыд! — стөчмөдіс батыс.

Коля кутіс мөвпавны и оз төд, мый шуны, сійө некор на эз сёйлыв көч няньтө. Весиг эз кывлыв сы йылысь.

- Вай либө сёйыштам көч няньтө! — корис Коля.
- Кутшөм сюсь! — серөктіс батыс. — Ковмас аскиөдз виччесьлыны. Аски менам шойччан лун. Мунам ми тэкөд вөрө тшак вотны. Мыйөн көрзинаясным тшакөн тырасны, сэки и көчыд сетас миянлы асьыс няньсө.

Аскинас Коляөс батыс садьмөдіс водз. Зонка өдийө пасьтасис-көмасис, босьтіс ичөтик көрзинка, батыс ыджыдөс, да и мөдөдчисны вөрө.

Вөрын гажа, лөсьыд, ыркыд. Ая-циа корсялөны тшакьяс, вочасөн тыртөны көрзинаяснысө. Но көрзина надзөн тырө. Коля нин мудзис, сылөн кутіс сюмавны кынөмыс.

- Батьө, мыйла нө та дыра көчыс няньсө оз сет?
- Эн тэрмась, — шуө батыс, — кор көрзинаясным тырөны, сэки и көч нянь лоө.

Коля котөрөн сорөн ветлөдлө пуяс костөд, зия корсялө гобьяс да масленикьяс, көсийө пановтны батысө.

Но со и көрзинаяс кутісны тырны. Батыс Колялөн гусьөникөн перйис мешөксьыс чышьянө гартовтөм рудзөг нянь шөрөмьяс, кодьясөс пыислөн төдлытөг босьтіс сьөрсьыс.

— Эй, Коля! — горөдіс сэсья батыс. — Көні нө тэ? Көчыд мем сетіс нин асьыс няньсө. Лок сөям.

Коля котөрөн локтіс батыс дінө, думсьыс зілис аддзывны көчсө, но нель кокаыд эз нин вөв. Зонкалөн ичөтик көрзинаыс вөлі тырөма тшакөн.

Пуксисны пашкыр коз улө. Батыс босьтіс ыджыд шөрөм, солалыштис сійөс да и мыччис Колялы:

— Но, пиө, сөй көч няньтө!

Коля зэв азыма пондіс сөйны.

— Чөскыд көч няньыд? — юалис батыс.

— Чөскыд, зэв чөскыд вөлөма! — шуис Коля вом тырнас няньсө мутшкиг-курччалігтыр.

ПЕРВОЙЯ УДЖДОН

Көкъямыс арөса Валерик оліс вөр лэдзысьяслөн виль посёлокын, көні весиг эз на вөвны школа ни пекарня. Гожея луньясө Вова другыскөд ворсісны. Другыслөн вөлі аслас ичөтик велосипед.

— Меным тожө велосипед колө, — няргөмөн кутіс корны Валерик батыслысь. — Кор нө ньөбан?

— Кор ачыд најөвитан сьөм, — шмонитөмпырысь вочавидзис батыс, коді уджаліс бухгалтерөн лесопунктын.

И со Валерик кутіс удж корсьны.

Мамыс пес пыртлө, а Валерик юасьө:

— Мамө, пес пыртлөмыс удж али абу?

— Удж, дитя, удж, уджав тшөтш мекөд, — вочавидзө мамыс.

Мамыс ведраясөн вала мунө. Валерик бара юасьө:

— Тайө удж жө?

— Удж, удж, дитяөй!

Валерик зіля кутіс отсасьны мамыслы. Керкаас пес пырт-

ліс, ичөтик ведраён ва ваяліс, эз дышөдчы и дждж чышкыны. Эз вунөдчыв быд асыв ассыс крөватсьө лөсьөдны.

Коркө бара батыслы казтыштіс велосипед йылысь, өні пө өд уджала нин.

— Молодеч, мый мамыдлы отсаян, — ошкыштіс писө бать, сэсса гөгөрвоөдіс: — Мамыд вөчө гортса удж да оз кор удждон, да и гортса уджсьыд ми некодлы ог мынтысьөй.

Жугыльмис Валерик: «Кытысь и аддзан удждона уджтө?» Тадзи мөвпаліг сійө восьлаліс посёлоклөн дзик өтка улича кузя сэтчөдз, кытчөдз ныр на ныр эз зурсь Ваня суседыскөд, коді вөлі некымын арөсөн ыджыджык сыысь. Тайө кадө Ваня вөлі вөв доддялө. Гожся кадө Ваня уджаліс, орчча сиктса пекарняысь ваяліс нянь.

— Ваня, босьт менө ас дорад уджыштны, — вөзіысис Валерик.

— А папыд оз вид? — юаліс Ваня.

— Оз! — нимкодя шуис Валерик. — Сійө мем уджавны тшөктө.

Ваня пуксьөдіс ичөтджык ёртсө телега вылө, киас сетіс кузь ньөр да тшөктіс өдйөджык вөтлыны вөвсө. Висьталіс, мый талун колө регыджык бөр локны посёлокө. Контораын пө кутасны сетапны удждон.

Ваня пекарняысь петкөдаліс нянь тыра мешөкъяс да сөвтис найөс телегаө. Валерик эз жө уджтөмав — турунөн вердіс вөвсө.

Посёлокө бөр воөм бөрын зонкаяс өдйө иналісны магазинө вайөм няньсө, лэдзалісны вөвсө да котөртісны контораө. «Касса» гижөда өшиньдорса өчередьө Ваня бөрся сувтіс и Валерик.

— Меным нө сетасны оз удждонсө, — полөмпырысь юаліс Валерик ёртыслысь.

— Ме ог төд, — нурбыльтіс Ваня. — Папыдлысь юав, сійө өд бухгалтер...

Валерик пырис бухгалтерияө да матыстчис пызан дорө, код сайын пукаліс батыс. Висьтасис талунья уджалөм йылысь,

кузь ньөрийөн вөв вөтлөм да турунөн вердөм йылысь. Юалис и удждон йылысь.

— Ладнө, мун сулышт, воас өчередьыс да сетасны, — меліа нюмъёвтіс батыс, коді сэсся матыстчис қассир дінө да гусьөн шуис: — Сет менам пиы кызь вит шайт, менам удждонысь...

Тайө шуөмсө Валерик эз кыв, өні сылөн юрас жөдзис дзик өти мөвп — велосипед ньөбөм йылысь.

ШЫШ

Петялөн мамыс мунө нин удж вылө, а пиыс пыр на узьө.

— Петя, чеччы, и талун Вова ёртыдкөд ветлөй луннас өмидз вотны. Керөспом йөрын, му борьясас, зэв уна кисьмөма өмидз, а рытнас өмидза йөв сёям.

— Но, мама, ме чечча и пыр жө ветла Вова ордө.

Кык ёрт, сёрнитчөм бөрын, босьтісны дозьяс — өтиыс тасьті, а мөдыс ичөтик туис и мөдөдчисны керөспом йөрлань, вөр дорөдз. Недыр мунөм бөрын налы паньд туй кузя локтө төдтөм баб.

— Кытчө нө, дона пиян, дозьяснас мөдөдчөмныд?

— Ми өмидзла, вёрдорса муяс дорөдз.

— Но-о-о, онө и полө шышьяссьыс? Шышьяс пө пышйөмаось, да йөзыслысь нянь коралөны...

— Бабушка, а кодьяс нө сійө шышьясыс?

— Лөк йөз, донаяс. Кодьяс оз уджавны, гусясьөны, косясьөны, а сэсся мыжсьыс веськалөны тюрьмаө. И сэсь пышйөны, — висьтавліс баб.

— Ми ог полöй шышъяссыд. Ме сийöс та-та-та! Автома-
тысь лыя, — кинас петкөдлөмөн збоя висъятавліс Вова.

Мунісны водзö, öмидза борйö воиг, кык ёрт сюся видзö-
дісны гөгөр. Абу-ö көнкө шышыс. Вёрдорса му бор дорын некод
эз тыдав. А öмидзыс дзык тыр, и найö заводитісны зіля öктыны.

А сийö асывнас водз-водз Иван дядь муніс вөрö тшак
вотны. И вöлі нин локтö гортас, петіс му бор дорö и аддзис
сы мында öмидз.

— Час, вотышта öмидзсö.

Тшак тыра пестерсö пуктіс бөрөзда бокö, пестер вевтсö
восьтіс и зіля заводитіс öктыны öмидз. И недыр мысти кыліс
сёрни шы и аддзис: кык зонка зіля öктысьöны и оз казавны
сийöс. Иван дядь көсийс повзёдыштны найöс, и кыз гөлөсөн
шуис:

— Дайте хлеба! Дайте хлеба!

Зонкаяс шөйөвошины-повзисны...

— Дайте хлеба! — мөдысь кыз гөлөсөн шуис Иван дядь, а
ачыс дзевсис кустъясö.

— Ой! Ой! Шыш! Шыш!

И зонкаяс ньöv моз мөдісны котөртны гортлань мир туй
кузя, бусыс бөрсянныс столбөн кайö. Иван дядь гөгөрвоис, мый
эз ков повзёдны челядсьö, и кутіс макайтчыны да горзыны, мед
оз повны... Но зонкаяс ы-ылын нин шутьөдісны. Петя да Вова,
сиктö воём бөрын, став йöзсö шызёдісны. Керөспом йöрын пö
шышъяс...

И öти зонка пыр жö котөртіс колхоз правлениеö, көн пука-
лö милиционер. И недыр мысти челядь чукөр милиционеркөд
мөдөдчисны Керөспом йөрлань.

Сиктысь петём бөрын налы паныд локтö Иван дядь, мышкас
пестерын тшак, а киас пестер вевтын тырыс öмидз. Милиционер
сувтөдіс Иван дядьöс и кутіс юасыны:

— Кысянь локтан?

— Вёрысь.

— Тан челядь аддзылёмаёсь шышөс...

— Хо-хо-хо, кутшөм шыш! Сійө ме вөлі. Ме прөста повзьөдыштны көсийи. А найө сідз и шутьөдісны, — правдайтчис Иван дядь.

— Тэ пөрысь морт, таdzi повзьөдны челядьөс оз позы! А найө, молодцы, мем көсийсны отсавны. А челядьөс повзьөдөмысь тиянөс ковмас штрафуйтны, — стрөга шуис милиционер. И та бөрын став сиктса челядь кутісны Иван дядьөс нимтыны шышөн.

ӨКСИНЬ ПӨЧ

Гожся шондіа мича лун. Сиктын чөв-лөнь. Вермысь йөз ставныс видз вылынөсь, турун пуктөны. Сөмын ю дорсянь кылө купайтчысь посни челядьлөн чилзөм шы.

Өксинь баб томдырся пөдругаыскөд, Анна бабкөд, пукалөны кильчө пос вылын да нимкодясьөны гажа луннас, важ том кадсө казьтылөны. Туй вывсянь почтальонша ыджыд сумканас кежис Өксинь баб керка дорө.

— Өксинь баб! Тэныд письмө вая, — өвтчис конвертөн. — Вай йөктышт!

— Мый нө тэ, Маша? Он жө йөктөд пөрысь мортөс.

— Но, сідзкө, сьылышт вай!

Өксинь баб лөсьөдыштіс юрсыс чышъянсө да небыдик гө-лөсөн заводитіс:

Томлунөй да том кадөй,
Алөй цвет кодь томлунөй.
Пөрысьми да омөльтчи,
Жальөн коли гажлунөй.

— Вот и аттё, зэв мичаа сьылан, Оксинья баб, — шуис Маша да мыччис письмөсө.

Баб кыкис зепсыс очкисө, косялис конвертсө да заводитис лыддыны письмөсө.

— Кысянь нин письмөйд? Кодсянь? — юалис Анна баб.

— Нывлөн, карсянь. Гижө тай, нывкаясөс пө гождя каникул дырийис мөдөдла тэ динө, сиктө. Мед пө бабыслы отсыштасны горт гөгөр да град выв уджъяссө вөчны. Да и вөрө пө нуөдыв, вотөс-тшак пө мед вотасны.

— Ыджыдөсь-ө нин внучкаясыд? — юасьө Анна баб.

— Ыджыдөсь, невестаяс нин. Öтиыс нель класс помалис, а мөдыс өд нин квайтөд классө вуджис.

Баб кутис виччысьны карса гөстясөс. Быдса во өд нин сиктө эз волыны.

И мөвпыштис баб внучкаясылы мыйкө ньөбны гөснеч. Магазинын зэв нин важөн өшалө зэв мича алөй рөма гипюр ковта. Кор баб пыравлис магазинө, пыр видзөдывлис сы вылө, сэтшөма вөли баблы воө сьөлөм вылас сийө ковтаыс.

— Ньөба тайө ковтасө Надялы, ыджыдджыкыслы. А Зиналы платтё ньөба.

Шуис тадз баб и вөчис. Вайис гортас да нимкодясьны оз вермы. Ковта да платтё вылас кыкнанныслы вурлис сикөтш мольяс. Кык лун ноксис да сэтшөм мича новланторъяс вөчис — сидзи и вералө син водзад уна рөмөн.

«Но и ёна жө радласны внучкайсөй...» — шудаа мөвпалис баб. Да сэсса нөшта кыкис гардеробсьыс асьыс медся мича да радейтана кык шөвк көсынка, кодъясөс сөмын новывлис ыджыд праздникяс дырийи. И радлигтырийи бара пуктис чойяслы гөснеч дорас.

«Мед найө новлөны, нимкодясьөны да тшашитчөны. Ме нө кытчө нин шөвкъяснас муна. Том йөз мед асьнысө петкөдлөны», — ас кежас сөрнитө.

Коркө воисны бабыс ордө нывкаяс: капрон чулкиаось, босоножкиаось, чышъянтөмось. Баблы мыйсюрө мамныс мөдөдөма карса сёян-юан гөснечьяс. И баб ассьыс пай көсийс найөс пыр жө козьнавны.

— Вот и ме тиянлы мыйсюрө дасьтё-лөсьөдө... Надялы со гипюр ковта, а Зиналы — платтьө сета.

Надя видлаліс, видзөдіс гөснечьяссө:

— Бабушка, мый нө тэ ньөбөмыд, өні гипюрыс абу модаын. Да сэтчө жө морөсас кыөмыд-вурлөмыд мыйкө... Тайөс кө ме пасьтала, став пөдругаясөй кутасны серавны... А-ха-ха! Да ещө и көсынка на дай... Öнө йөзыс куш юрси кежсьыс ветлөны. Юрө өд ог жө көртав чышъян? Мый тэ, бабө, лоин?

И Надя бөр ставсө бабыслы ки вылас пуктіс. А сы вылө видзөдөмөн и Зиналы эз туй пөдаркыис: важ нога пө, кольөма нин модасьыс.

Баб босьтис ставсө да бөр суйис гардеробас. Горш діныс гөрддзасис дөзмөмсьыс, синваыс доршасис, вот-вот тюрөбтас бандзиб кузяыс. Но кызкө мырдөн асьсө кутіс жө да сгөвөра шуис:

— Но, нинөм кө менам гөснечысь тиянлы оз шогмы, и сытөг оланнөд.— А ачыс пачводзө муніс да гусьөник бөрдіс. Сэтшөм сьөлөм вылас эз ло лөсьыд. Öбидитчис.

Кор пуксисны сөйны, пызан сайын кык чөй нюмрасисны:

— Тайө оз ков. А тайө оз шогмы. Сийө абу чөскөд,— и мамыслысь баблы вылө ыстөм карса гөснечсө ставсө өти здукөн бөрөдісны, бабыс весиг көрсө некодлысь эз кывлы.

Рытнас баб ломтіс пывсян. Гашкө пө, туяд кынмыштісны да, бусөссисны да, мед шонтысясны. Петісны пывсьыны. Баб локнысө нывьяслы петкөдіс телогрейка да шуис:

— Кайиганыд мыш выланыд плавгөй. Төла, да пывсьөм бөрад мед он кынмөй.

Но нывъяс телогрейкатö öшöдöмаöсь пöварняяс тув йылö.

— Тi нö мыйла паськöмтöг мунöмныд?

— Бабушка, йöзыс сераласны... телогрейкааöсь пö...

— Ой-ой-ой! Кутшöм карса госпожаяс воисны! Кодi нö пывсян дорас тiянöс сералас? Сэн некод абу. Часлöй, висьман-ныд да казяланныд, — ропкис баб.

Мöд рыт сиктö гуляйтны мöдöдчисны кык чой.

— Босоножкинад энö мунöй. Миян öд сиктад абу асфальт. Кöмыд няйтас пракмунö. Тi кöмалöй резинöвöй сапöгъяс. Көть абу нин дзик выльöсь, но дзоньöсь на, — и сетис баб сапöгъяс.

Нывкаяс зэв неокотапырысь кöмасисны и петисны. Недыр мысти ывлаас кутис зэрны. Баб чукöртис войтва и ведраөн нуис пывсянö. И мый аддзис? Ой! Но и нывкаяс! Кыкнан сапöг гозыис сулалисны пывсян öдзöс дорын. Мунöмаöсь босоножки кежыс, а зэрö...

Воисны нывъяс сёрөн. Баб узьöм улö лэдзчысис. Чойяс кынмöмаöсь, кокъясныс и паськöмныс ставыс ва, кöмъясныс кыкнанныслөн оръясьöма-киссьöма.

Баб чеччылис, кöмнысö и чулкияснысö мыськалис, ставсö пукталис косьтыны. Няйтнас öд суседыслы дöмны он петкөд.

Öтчыд чуксалö ассьыс гөстяссö Öксинь баб:

— Надя! Зина! Чеччöй нин, сёйыштамöй да ветламöй вөрö чöдла. Пасьтасьöй топыджыка, шоныджыка, мед он кынмöй да мед номъяс оз сёйны, — шуö баб.

Лöсьöдiс кык гоз сапöг, кык чышъян, кык гач, кык чуман.

— Со ставсö тiянлы лöсьöдi. Пасьтасьöй и менö вöтöдöй. Ме öд ньöжiö муна да мöдi нин вөрланьыс, — а ачыс мөвпалис: «Но кызд пасьтасясны, сiдзи и олас... Велаласны, номыис сёяс да, кöтасясны да».

Регыд и вöтöдiсны бабсö нывъяс — кианыс кöрзина, босоножкияöсь, капрон чулки кежыс, чышъянтöмöсь.

— Но, вөтөдіннүд? Тадзи и мунаңнүд? Номъяс өд вильө-
дасны. Ми өд вөрө мунам, лунтыр кезлө...

— Нинөм, бабусь...

Воисны вөрө. А чөдья местаыс ылын. Колө нюр вуджны. А номйыс дзик тырыс, быдлаө сатшкысьоны... Нюрсө вуджигөн босоножкияс ковмис пөрччыны. Көмтөг мөдисны собны, чирзөны-горзөны, ваыс пө көдзыд, кокным пө кынмө и доймалө, номъяс пө юрнымөс сөйөны...

Чөдйыс эськө и уна воис, да эз кутны вотчыны, ном пө сөйө. Зина нин бөрдө:

— Мунамө гортө, ой! Номъясыс быдлаө пырөны!..

— Колө өд кывзысьны вөлі. Мыйла эн пасьтасьөй? Менө вот оз сөй номйыд. И пасьтасьөмысь менө некод оз серав.

Вотчөм эз и артмы: Зина бөрдис, и Надя нин мөдис лимзавны.

— Но өні кө кодкө аддзас бөрдөмнүтө и збыль сералас тиян ылын: невестаяс пө бөрдөны, а оз вотчыны.

Мөдисны гортө тыртөм дозьясөн. Туй ылас зэв чорыда зэр-мис, ковмис пу улын сулавны. Нывкаяс кынмөны-тиралөны. Баб нин ассыыс юрсыыс чышьянсө Зиналы көрталіс.

Войнас кыкнан чойсө биаліс. Баб вежон бурдөдис нывкаясөс. Юкталіс пөжөм турун ваөн прөстудаысь, голянысө пөсь пөйма дөраөн көртавліс. Оксинь баб горт гөгөр уджьяс эштөдас, пуксяс внучкаяс дорас да сөрнитө:

— Öні, донаяс, кывзөй менсьым и ставсө сюркнялөй пель саяныд. Кывзысьтөм вөсна, тшапитчөм вөсна здоровьенүтө тшыкөданныд. Паськөм вылө сөмын төлктөмыс вермө серавны. Быд көм-паськөм ас туйө. И менө ті өна дөзмөдіннүд куражитчөмнад. Гөснеч оз шогмы, сөян оз шогмы, көм оз шогмы... А ми кызз быдмывлім? Пөттөдз эг сөйлөй, көм-паськөм эз вөв. Ме кор нин ачим куті уджавны, первой ньөби аслым штапель платтьө. А сьөдз быдмигчөж новлі кольөм көм-паськөмсө гырысьджыкьяслысь. А дедыд карө муңлөма велөдчыны чойыс пальтоөн. А ті

мода бѳрся вѳтчанныд, мед эськѳ пыр виль вѳлі. А сы вылѳ ѳд колѳ сьѳм. А ті кымын шайт ас нѳмнаныд најѳвитінныд?

Нывкаяслы татчѳ и висьтавнысѳ нинѳм. Яндзим налы лои.

— Бабушка, ми сѳссия кывзысьны кутам,— шуис Зина.

— Ме кута кѳсынкатѳ новлыны,— шуис Нада.

— Сапѳгтѳг вѳрад сѳссия ог нин мунѳй,— кык чѳй пыдди кѳсйысис Зина.— Вай миянлы гѳснечтѳ бѳр.

И баб дасьтылѳм гѳснечсѳ бѳр сетіс внучкаясыслы.

АЛѢНА

Мойдкыв

Визув ю дорын, джуджыд нѳрысын сулаліс зѳв мича ѳтка керка. Сѳн олісны ичѳтик нывка Алѳна аслас мамкѳд да скѳр дядькѳд.

Мам унаысь висьтавліс Алѳналы баты йывсьыс:

— Тѳнад батыд, дона нылѳй, вѳлі бур, мича, ѳн. Тѳнад, донаѳй, ныр-вомыд дзик батыдлѳн кодь. Сы вѳсна и тѳнѳ вывті ѳна радейта. Кор тѳныд вѳлі кык арѳс, батыд муніс визув юѳ чери кыйны. Но кыпѳдчис сьѳд кымѳр, гымалѳмѳн кыптіс ыджыд бушков. Да сѳтшѳм ыджыд! Ме полі, мый керкалысь вевтсѳ тѳлыс нѳбѳдас. И батыд, донаѳй, веськаліс сѳтчѳ бушков улас. Гырысь гыясыс и бушколыс путкыльтѳмаѳсь батыдлысь пыжсѳ визув ю шѳрѳ, и сійѳ вѳйи визув юас. А ме кутшѳма бѳрді и ѳні бѳрда, сѳтшѳм жаль меным батыд.— Мам чышкаліс синвасѳ, коді тюрис-визувтіс чужѳмбанѳдыс.

— Эн бѳрд, дона маменька! Эн бѳрд! Вай бара сылам мича сыланкывъястѳ, кодѳс велѳдін тѳ,— Алѳна кутліс да окаліс мамсѳ.

И босьтчылісны эня-ныла надзѳник сьывны нор мича гѳлѳ-сѳн:

...Визув ю кузя,
тэрыб гы вывті
лэбзьö ыджыд пыж
еджыд паруса...

Мича платтьöа ичöтик Алёна бобув моз шпоркъяліс мамыс гөгөр да тшöтш вöсньыдик гөлöсөн лывкйöдліс. Весиг ветлысь-мунысьяс сувтлёмөн кывзисны налысь мича сьылёмсö.

Скөр дядь рытнас вольвліс удж вылысь гортас, вайліс сьöр-сьыс сулея вина и юис... А сэссия ыждаліс мамыс вылын: эз шогмыв сёян, то пöсь, то сола, то чöскыдтöм. И горзіс Алёна вылö, мыйла сійö дугдывтöг дзольгö да котралö джодж кузя.

Воис гажа гожöм. Алёна мамыскöд тшöкыда ветлывлісны визув ю берег дорö, чукöртлісны оз тусьяс, öмидз и мича дзоридзьяс. И сьывлісны мича сьыланкывъяс. Алёналы вöлі нин сизим арöс. Мам унаысь шуывліс:

— Дона нылöй, ме тэныд вура мича платтьö, ньöба мича тупли да портпель. И тэ мунан школаö велöдчыны. Бура велöдчан и лоан ыджыд бур мортөн — артисткаөн.

Алёна радліс и виччысис, кор нин сьлөн лоö виль тупли, мича платтьö, портпель и сійö кутас котравны школаö.

Но лоис ыджыд шог: мамыс виччысьтöг висьмис и куліс. Алёна сэтшöма бöрдіс и шогсис, эз ю ни эз сёй быдса вежон чöж. Бöрдіс:

— Кыдз нö ме кута овны дона мамтöгыс? Коді нö меным мелі кывсö шуас? Коді нö менö жалитас?

Скөр дядь шуис:

— Кутан мамыд моз мем сёян-юан лöсьöдны, пес и ва вайны, чышкыны и мыськыны керка пытшкös, и мем кöм-паськöм мыськыны...

Алёна полігтыр юалис: «А школаö муна?»

— Школа йылысь бöрын. А öні уджав, весь эн пукав, — скöра шуис дядь и муніс.

Рытъяснас важ моз вайлывліс сулея и юис, а сэссия горзіс Алёна вылö:

— Пачтö омöля ломтöмыд! Сёянтö шогмытöмöс пуöмыд!
Няйт гачöс абу мыськöмыд! Он кö кут ставсö бура вöчны, ме пет-
кöдла тэныд пуж!

Алёна дзэбсьывліс паччөр сэрöгö шырпи моз и эз лысьтлы
вөрзбöдчыны, кытчöдз скөр дядь эз унмовсьлы. Нывка эз тöд, мый
сійö «пужыис» сэтшöмыс и вывті ёна поліс дядьсьыс.

Мöд луннас Алёна бара кольліс öтнасөн и лун-лун уджаліс-
котраліс: ывла сарайысь пыртліс пес, нельысь ли витысь визув юö
кык ичöтик ведраясөн лэччыліс вала, мыськавліс джодж, пеславліс
ассьыс и дядьыслысь кöлуи и тölöдіс-косьтіс шонді водзын, вурліс
да дöмліс кисьöм паськöм. А рытланьыс ломтывліс пач да пуис
сёян скөр дядьлы воигкежлас. И пыр поліс, мед дядьыс эз петкöдлы
сылы «пуж». А öтнасөн горт гөгөр уджаліс, то бөрдіс аслас шудтöм
олöм вöсна, бать да дона мамыс вöсна, мыйла найö эновтісны ась-
ыныс ичöтик нывнысö скөр дядьлы. И сьывлывліс нориника дона
мамөн велöдöм сьыланкывьяс.

Воны кутіс школаын велöдчан кад, а Алёнкалөн абу ни мича
платтьö, ни выль тупли, ни портпель. И öтчид, кор скөр дядь
воис удж вылысь, Алёна збоймöдчис и юаліс дядьыслысь, коді
бара нин юис вина:

— Дяденька! Регыд ковмас школаö мунны. Кор мем ньöбан
портпельтö?

— Ньöба! — равöстіс скөр дядь.

— И нöшта платтьö да тупли, — полігтыр содтіс Алёна.

— Но-о-о! Ещö тэн мый оз ков?

Дядь сёйö вöлі да паньсö ляскис джоджö, зэв скöрысь чеччис,
кватитіс паччөр сэрöгын сырмысь Алёнаöс шошаöдыс, кокнас
чужйöмөн восьтіс керка öдзöс да шыбитіс пемыд ывлаö Алёнаöс...
Каньпиöс моз...

— Вот тэныд и школа, и портпель, и платтьö, и тупли! Уби-
райтчы менам син водзысь! — Крапнитіс кильчö öдзöс и игналіс
гольс.

Алёна шлөпмуні кильчöпомса ва гөптö, кöтасис и няйтчис. И
ёна доймис кийс. И дыр бөрдіс, чеччыны эз вермы. Но сэсся,

кыдзкө чеччис жө. Ывлаыс вөлі пемыд, көдзыд. Киыс доймис. Бөрдөмысла висис юрыс. Кутіс кынмыны. Но поліс и эз төд, мый вөчны, кытчө мунны. Гортө он пыр. Сиктөдз вель ылын...

Скөрысь ызгис-визувтіс паськыд ю. Алёна пуксис джуджыд кыр йылас и зэв дыр бөрдіс. Кутіс ёна кынмыны. Кынөмыс сюма-ліс. И мөдөдчис ю пөлөн мунысь паськыд туй кузя сиктлань, коді вөлі вөр ді сайын. Дыр муніс Алёна, мудзис и пуксис туй бокө куст улө шойччыны. Мед кынмөмсө да дойсө эз кыв, Алёна босьтчис надзөник сьывны мамөн велөдөм сьыланкыв:

...Сирөтаөн коли өтнам, коньөр нывка.

Оломой менам мунө бөрдөмөн-шогсьөмөн.

Ой, коньөрөй, ме зэв гөль, лёка пасьтасьөма...

Некод бур кыв оз шу мем, быдөнлы ме ковтөм.

И быттьө лөсьыдджык и шоныдджык лои. И Алёна вугыртіс куст улө. Унмовсис...

И вөталіс, быттьө скөр дядьыс сійөс вөтөдө, а сійө пышійө мый вынсьыс. Со нин джуджыд берег дорө воёны. Вот-вот суас дядьыс кипод улө, и сійө петкөддас пуж. Но нем виччысьтөг быттьө лои вывлань катөдысь пос, сэсся мөд, коймөд. А улысь содъясыс-посъясыс бырөны. И Алёна пыр вылө и вылө кайис небесалань. А дядьыс коли му вылө...

И воис зэв мича места. Йөзыс ставыс зарни паськөмаөсь и зэв шаньөсь, бурөсь. И керкаясылөн вевтьясыс ставыс югьялісны зарниөн... И Алёна садьмис.

Алёнасянь неылын бадь нёр вылын пукаліс да зэв нора да мичаа сьыліс ичөтик кайпи. Нывка поліс вөрзьөдчыны, медым не повзьөдны сійөс. И збыльысь, кор Алёна вөрзьыштіс, кайпи жбырк-нитіс-лэбис.

Ывла выв муртса на югдыштіс. А сэсся мыччысис зарни шонді. Алёна сырмис-кынмис и лэбачпи моз жө мөдіс сьывны. И сьыліс, и сьыліс. И быттьөкө лои шоныдджык, кынөмыс омөльджыка кутіс сюмавны. А ачыс сьыліс и сьыліс...

И төдлытөг кыліс гөлөс:

— Эй! Коді тани татшөм мичаасө сьылө?

— Ой! Коді тайө? — Алёна повзьөмысла ланьтис да пьдөджык понөль улас дзевбис.

— Тайө ме, донаой. Эн пов. Ме немтор ог вөч тэныд. Ме дырнин кывзи тэнсьыд мичаа сьылөмтө,— шуалис небылн сулалысь бура пасьтасьөм дядьө. Кияс кутис шляпасө. Нюмьялис, медым нывка эз пов сыысь да петис сы дорө.

Алёна пыр на сырмис понөль улын. Төдтөм дядьө юасис:

— Мыйла тэ тан өтнад вөрас, татшөм водз? Мый нимыд?

— Алёна,— нора шыасис нывка.

— Коді мамыд?

— Кулис...

— Коді батьыд?

— Ваө вөйис...

— Кодкөд олан?

— Гортысь вөтлис скөр дядь...

— Кытчө мунан?

— Ачым ог төд кытчө. Но гортө ог мун.

Алёна быттө эз кут повны төдтөм мортысь. А дядьө зэв меліа корис, мед Алёна мунис ськөд карө овны.

— Лоан миянлы рөднөй нылөн. Мөвпышт, донаой!

Алёна дыр мөвпалөм бөрын петис понөль улысь и көсийисис мунны төдтөм дядьөкөд карө. Петисны найө паськыд туй вылө. Сэни сулалис мича каретаө додьялөм вөв. Төдтөм дядьө пөрччис асьыс пальтосө, тубыртис Алёнаөс да пуксьөдис мича каретаө аскөдыс орччөн.

— Но, Савраско! — горөдис вөв вылас. И рөдтисны карлань.

Алёналөн карын лои вьль мам, вьль бать, и аслас горт. И кутис зэв бура овны. Ньөбисны сылы мича платтө, вьль тупли и школаө ветлыны портпель. Алёна кутис велөдчыны бура, вөлі кывзысьысь, зиль и рам. И велөдчис артисткаөдз. И кутис сьывны ьджыд театрын мамыслөн велөдөм мича сьыланкывьяс, кодьясөс мукөд артисткаяс эз и кивлыны и эз кужны сьывны.

П Ь Е С А

КЫВЗЫСЬТӨМ НЫВКАЯС

Куим юкөна ворсантор

Ворсысыяс:

М а т р е н а — баб.

И р и н а — баблөн пөдруга.

Н а д я — почтальонша.

Н и н а —

В а л я —

М и т я —

} Матрена баблөн внучкаяс да внук

І ЮКӨН

Воссьö занавес. Сиктса керка пытшкөс, кык пөдруга юоны чай да сөр-нитöны.

М а т р е н а. Да-а, том дырйи эгö вевъявлö тадзи луннас пукавны да юны чай, пыр вöлі котöртан колхознöй уджъяс вылö, а рытнас пемдö нин, гортад воан да, войöдзыс он ланьтлы, то град йөр уджыд эндöма, челядьтö вердны-юктавны колö, то мöскыд вердтöм-юктавтöм да лысьтытöм.

И р и н а. Сідз, пөдруга, сідз, тырмывліс тэа-меалы уджыд. Ме

вөлі скөтнөй картаын уджала да шондї петїгөн колө нин котөртны мөсьясөс лысьтыны, мед ёна лөдз-ном петтөдз гожөмнад вевъялісны йирсыштны, сөйныд он вевъявлы, вөлі нянь шөрөм босьта да мунїгмоз и сөйышта.

Матрена. А өні со быдтысим, вердїм-юкталїм челядьяснымөс да эновтїсны дай. Ме со өтнам ола и тэ өтнад олан.

Ирина. Ме регыд на ветлі гөститны пи ордө карө, налөн 9-өд классын велөдчө ныв.

Матрена. Да ёна-ө нин тшапитчө-краситчө?

Ирина. Гортас немтор оз отсась, кисьыс гыжъяссө быдтөма да краситөма...

Матрена. Сэссия өд краситөм гыжъяснад доздукъяс мыськавны он кут, гыжйыд чегас дай, краскаыд мынас дай...

Пырө Надя, почтальон сумкаа, киас письмө.

Надя. Видза оланныд, Матрена баб да Ирина баб. Чай юыштанныд?

Матрена. Лок, бур нылөй, лок. Микөд чай юам.

Надя. Аттьө корөмыд вылө, но ме ог эшты, со сумка тыр письмө да газет, колө разөдны. Со и тэныд, Матрена баб, вайи письмө... Он кө йөктышт, ог и сет письмөтө...

Надя пуксьө лабич вылө и киас письмө.

Матрена. Надюша, йөктынытө ме пөрысь нин, а вай ми пөдругакөд тэныд важ коми сыланкыв сылам. (Шыасьө Ирина дїнө.) Ирина, отсалан мем?

Ирина. Отсала, вай горөдлам кутшөмөскө. Вай «Шогсьысь нывтө» сылам.

Кык пөдруга пуксьөны Надя дорө и заводтөны сывны «Шогсьысь ныв».

Мотив «Көн олам ми, сэн сулавліс зэв важөн пемыд вөр».

Кор ме вөлі кызь арөса,
Ме вывтї вөвлї збой.
Лөк керкаө, важ керкаө,
Ме ветлывлї быд вой,

Ме мыйла сэтчө ветлывлі?
Сэн оліс мича ныв.
Эз некор сійö гажöдчыв,
Эз серав ни эз сьыв.

Пыр пукаліс, пыр думайтіс,
Мый думайтіс, ог төд.
И сійö менсьым юаліс,
Тэ туйö он-ö мөд?

Вай мунам татысь ылöджык,
Мем тані вывті шог.
Ог узьыв пемыд войяссö,
И бөрда лун и вой.

Лөк йөз вылө эн видзöд тэ,
И гажаджыка ов,
Дай радейт менö ёнджыка,
Дай некодысь эн пов.

Ме гажöдлі, ме бурöдлі,
Пыр шогсис мича ныв.
Ме ачым сэссия жугыльтчи,
Ме ачым эг ло збой.

Надя сетö баблы письмö.

На д я. Но и аттё тiянлы сьылöм выланыд. Ме некор на эг кывлыв тайö сьыланкывсö, зэв мичаа да нораа сьылiнныд, менам синвайй быдөн петалис. Но босьт письмötö да лыдды. Став бурсö тiянлы.

Надя петö керкаысь. Матрена восьтö письмö и лыддö.

М а т р е н а. Карсянь тай нылыслөн. Энлы, мый нин гижö

(лыдддьö). Видза олан, дона мамöй, тайö гижö Лена нылыд. Мамö, кутшöма нин олан? Кутшöм здоровьед? Он-ö висьöдчы? Мамö, ме кöсья гожся каникульяс дырйиыс челядьöс мөдöдлыны сиктö тэ дорö. Нина ыджыд нин, 7-öд класс помалис, а Валя 5-öд класс помалис, нывкаясыс оз-ö мыйкö тэн отсыштны гортад и град гө-гöрыд и нуöдлы вөрö, мед вотыштасны пув да тшактор, төвнад сөйсяс. Ми батыныскöд уджалам да огö вевъялö отпускöдз волыны тиянö. Уна ог гиж, виччысь, воасны бабөн шуысьясыд. Аддзысь-лытöдз. Тэнад ныв Лена.

И р и н а. Но-о, отсасысьяс тэныд воасны. Ёна и отсаласны мыйкö... Виччысь...

М а т р е н а. На отсөгөн он нин ов, ачыд кö он вöч. (Ви-дзöдлö öшиньö). Ой, пöдруга, видзöдлы öшиньö. Со локтöны нин. О-о, куимөнöсь! Зонкаыс, медичöтыс, Митя, тшöтш локтö.

Пырöны керкаö Нина, Валя и Митя. Ниналөн киас сумка, нывкаяс чышьгянтöмөсь, босоножиабсь, а Митялөн кокас сапöг и юрас шапочка.

Н и н а. Видза олан, бабö. Гöстьяс воим.

Кутлöны ставөн бабö.

М а т р е н а. Локтöй, локтöй, дитяяс. Ме сöмын на мамыд-лысь письмöсö пöлучити, а ти нин со воинныд, гижö, воасны пö гöстьяс-а. Кыдз нö локтид?

Н и н а. Автобусөн. Уна йöзыс воисны да пуксьыны вöли не-кытчö...

М а т р е н а. Но пöрччысьö, ме сөйны мыйкö лöсьöда, кынöм-ныд, көнкö, сямалис? (Челядь пöрччысьöны.) Но... босоножиабсь кык невеста, миян öд абу карыд, абу асфальт, туйыд няйт, моски абу. Зэрас кö, мунныд он вермы.

М и т я. Ме, бабö, сапöга, няйтöдыс муна.

М а т р е н а. Бур, пиукöй, бур. Молодец, тадзи и колö сиктад локны, тан öд миян асфальтыд абу. (Баб лöсьöдö сөйны, челядь пуксьöны пызан дорö.) Ирина, гашкö, аски ветлам вөрö нывья-сыскöд?

Ирина. Ветлам, оз кӧ кут зэрны. Мыйкӧ ӧд век сюрӧ, пув ли, тшак ли. (Ирина мунӧ гортас.) Аски ме локта.

Нина (вайӧ сумка и лэптӧ пызан вылӧ печенье, булки).
Бабӧ, со тэныд мамӧ гӧснеч ыстис.

Матрена. Но аттӧ, сӧйӧ асьныд, сӧйӧ.

Челядь сӧйӧны и чеччӧны.

Нина. Бабӧ, ми локтигӧн аддзылим гижӧд, тиян клубад пӧ талун концерт. Ми Валякӧд ветлам клубас, а Митя мед гортын олӧ.

Матрена. Ветлӧй, ветлӧй, Митя мекӧд олас. Но миян клуб дорыс зэв няйт, да босоножкинад вӧянный няйтас. Час, ме корсьла, мамыдӧн на тані сапӧгьяс эмӧсь, сӧйӧс кӧмалӧ. (Баб петӧ сапӧгьясла.)

Валя. Нина, тэ сапӧгьяс? Ме ог-а, йӧзыс дивитасны, карсянь пӧ локтӧмаӧсь ыджыд сапӧгӧн.

Нина. Ме ог жӧ сапӧгьяс. Бабтӧ пӧрьялам, посводзӧ дзебам сапӧгнымӧс, а асьным босоножкиӧн мунам.

Пырӧ баб, вайӧ кык сапӧг гоз, мыскалӧма-югзьӧдӧма кремӧн.

Матрена. Со зэв лӧсьыдӧсь, тайӧс кӧмалӧй... Кӧть и Валялы ыджыдджык на. Нинӧм. Зато кокыд лоӧ кос да шоныд.

Нина сумкасыс перӧй краскаяс да заводитӧ краситны син дорьяссӧ. А Валясы бӧрся тшӧтш. Первой краситисны син дорсӧ лӧзӧн, сӧсся гӧрдӧн, а синкымьяссӧ сьӧдӧдисны.

Валя. Но, бабӧ, мичаӧсь лоим?

Баб повзӧ.

Матрена. Ой, ой, ой! Мый нӧ чужӧмнытӧ вӧчид? Повзӧдчысыс кодӧсь лоинныд. Кутшӧм мича нывкаяс вӧлинныд да. Ноко бӧр чышкалӧй. Ті краситчытӧгыс томӧсь да зэв мичаӧсь. Вот татшӧмьяс вылад миян сиктса йӧзыд сералӧны. Кутшӧм

повзьёдчысьяс пö нин воöмаöсь.

Н и н а. Огö, огö чышкалöй, öнi карад став том йöзыс тадзи краситчöны.

М а т р е н а. Юраныд мыйкö кöртыштöй, тöла ывла вылыс. Ме тiяны мича кöсынкаяс ньöби, энлöй, корсьла.

Баб кöсынка корсигкостi нывкаяс босоножкинысö кöмалiсны, сапöгьяс сьöрсьяс петкöдiсны дзебны и петiгас горöдiсны.

Н ы в ъ я с. Бабö! Эн корсьысь, ми мунiм нин. *(Петöны.)*

М а т р е н а. Но и нывкаяс, кынмасны öд чышьянтöгныс. А тэкöд, Митя, бур пи, ми кыкөн олам.

М и т я. Бабö, а тэ сэсья мен мича мойд мойд.

М а т р е н а. Водам да мойда мича мойдтö. *(Митя петалö посводзö да пыртö кык сапög гоз.)* Баб водны лöсьöда.

М и т я. Бабö, со Нинаыд да Валяыд сапөгтö абу кöмалöмаöсь, кыкнан гозийс вöли кильчö öдзöс дорын.

М а т р е н а. Но и кывзысьтöм нывкаяс. Висьмасны да кынмасны, кывзысьтöм вöснаыс.

Занавес

II ЮКÖН

Воссьö занавес. Вөр, кымынкö понöль да мыр. Петöны сцена ывлö Матрена, Митяöс кидыс кутöмөн, да Ирина, кианыс бабöяслөн ведраяс, сапöгаöсь, паськöмаöсь.

М а т р е н а. Но-о, нюрсö лои вуджöма, шойччыштамö, Митя, нокö горöдлы, мед мöдарö чойясыд эз мунны.

М и т я. Нина-а! Валя! Ми танöсь, локтöй öдйöджык татчö. А-у-у!

Г ö л л ö с ъ я с нывкаяс лөн. А-у-у! Ой! Ваыс зэв кöдзыд. Ой! Кокöй доймис! Виччысьлöй! А-у-у.

Сцена вылө петісны кык чой, босоножкияоьсь, чышъянтөмөсь, дженьыд соска платтьёаоьсь, кианыс ведраяс. Валялөн коксыс вир визувтө. Нина хотө. Кык-нанныс няйтөссёмаоьсь, ваоьсь.

Матрена. О господё! Көмтөмөсь, чышъянтөмөсь. Мый нө ті энө көмасьёй-пасьтасьёй. Ме жө ставсө тиян ныр уланыд пукталі, шуи: көмасьёй-пасьтасьёй и вөтөдөй миянөс. А ті... Дивө дай сөмын (*швачкө кияссө бокас.*)

Ирина. Но и нывъяс, энө өд паркө гуляйтны воө, а съөд вөр шөрө вотчыны лунтыр кезлө. Мый нө бабыдлысь онө кыв-зысьёй? Сійө тиянөс бурө велөдө.

Матрена. Лок көть партукөн көртала коктө, мед вирыс эз пет. Коді нө көмтөг локтө вөрө. Вот и доймис.

Валя бөрдө. Бабыс сылысь коксө көрталө партукнас.

Валя (*синвасө чышкалө*). А номйыс да лөддзыс тыр, курч-часьёны. Ой! Бара курччис. Ой! То кодзувкот кокө кайө... Ой! Ой! (*Вөтлалө, кучкалө номъясөс, баб көрталө коксө.*)

Нина дузгөдчөмөн сулалө, номъясысь да лөдзясысь өвтчө ыджыд роскөн.

Матрена. Но вотчөй, то пуяс саяс пувйыс мыйта тыдалө... то тшак сэн быдмө... Öктысьёй.

Нина. Кыдз тан өктысян, номйыс тыр, кыз курччасьёны! (*Кокас кучкө.*) Ой! Кутшөма курччис! Ме ог вермы өктысьны.

Митя понөль сайысь петө, киас тшак.

Митя. Бабө, со мем тшак сюри, на ведраад пуктам. (*Пуктө.*) О-о, уна нин тэнад, бабө, пув и тшак.

Матрена. Бур пи! Öктысь, дитяөй! Чойясыд со оз өктысьны-а. (*Митя котөртө понөльяс сайө.*) Ирина бабныдлөн нин то ведраыс регыд тырас-а, а нывъяслөн тыртөм...

Н и н а. Ми огö вермö... мянöс ном сёйö, кокным доймалö...
Мунамö гортö...

И р и н а. Но и дыш кывзысьтöм невестаяс. Юрныд оз уджав али мый? Код нö тiян моз вөрö локтö, тшапитчанныд, вот öнi тi вылö быдөн сераласны. Вöрысь пö тыртöм дозийөн локтöны. Смек и йöз серам.

Валя бöрдö, оз вотчы, виалö номъясöс да роскөн öвтчö. Нина пукалö мыр вылын, корöсь ыжда роскөн öвтчö.

М а т р е н а. Но и дивö, та ылнаöдз локтiм, нюрсö кызд келим да бөр тай ковмас вотчытöг мунны гортö. Но локтö мунамö бөр. Эн бöрдöй! Кызд öнi көмтöгныд нюрсö бөр вуджанныд, нюрас ваыс йи кодь көдзыд, босоножкиныд коляс вутш костас, кынмас кокныд... висьманныд... Ок! Ок тi, кывзысьтöм нывкаяс!

Ставөн мөдöдчöны мунны гортö.

З а н а в е с

III ЮКÖН

Воссьö занавес. Баблөн керка пытшкöс. Вольпасьын куйлöны Нина да Валя, голянысö көрталöмаöсь чышъянөн, кызöны, гөлöсныс абу. Баб кружкаөн вайö лекарство. Митя ворсö джоджын.

М а т р е н а. На, тайö юйi, турунъяс пöжи прöстудаысь, прöйдитас висьöмныд, бöрти сёсся ломта пывсян, да пöсь пывсянас сiдз тiянöс корöсьөн швачкöда, мöдысь он тшапитчö-кынтöдчö да кутанныд кывзысьны. Мамныдлысь гортад тожö онö кывзысьö, кöнкö?

Пырö И р и н а.

Ирина. Лоо видлыны пыравны. Кыдз нин оланнуд? Ста-
вөн-ө дзоньвидзаёсь?

Матрена (индө). Со тай төрыт кынмөдчисны да талун
вольпасынёсь, кыкнанныслөн жар лыбёма, кызөдоны, гөлөсныс
абу, көть и гожом, мян войвылад нюр ваид йиа көдзыд.

Ирина (ышловзё). Нывъяс, колө өд асьнытө аслыныд
видзны. То өд асьтө видзтөгыд... Менам вөлі пи Вася, 16 арөса,
тадз жө вөлі арлань, воис удж вылысь пөсялөма — юис юкмө-
сысь йиа көдзыд ва, а сэссия рытнас гуляйтны петіс өти дөрөм ке-
жысь, пинжактөг, шапкатөг, а вөлі вой төв, сэссия зэрмөма и прөс-
тудитчис, мөд луннас дитяёй и чеччыны эз вермы вольпасысь,
40° жар, «двухстороннее воспаление легких», больничаясь өтка-
житчис: ог пө мун — бурда... И вот сідзи и кулі, 16 арөсөн. (Бөр-
дө, синвасө чышкалө). Ачыс асьсө виис, а ме нэм чөж сы вөсна
бөрда... Нывъяс, нывъяс, видзөй асьыныд дзоньвидзалунтө, ась-
ныд кө онө видзө, некод оз вермы тіянөс видзны, ті өд гырысьсөсь
нин, гөгөрваод.

Митя (сүвтө Ирина водзө). А ме, бабө, ог вись. Вөрад
сапөгөн ветлі и ме бабөлысь пыр кывзыся.

Ирина (юрөдыс малалө). Кывзысьны и колө.

Баб нывъясөс бара лекарствоён юкталө.

Нина. Бабө, прөстит мянөс, ми сэссия кутам кывзысьны,
кыдз тэ шуан, сідзи и вөчам, ми огө көсийө кувны Васяыс моз...
Но, бабө?..

Валя. Бабө, ми сетам кыв, кутам ставсө вөчны-кывзыны,
тэ ми вөсна эн шогсы... Ми, сетам кө кыв, пөртам олөмө.

Матрена. Но, зөлөта гөраяс, ме надейтча и верита, мый ті
лоанныд бур, кывзысьысь да зіль нывкаясөн. И школаад бура
кутад велөдчыны и кывзысьны велөдысьясыдысь.

КЫВБУРЪЯС

ЫДЖЫД АТТЬӦ

Ичӧтысянь быдся уджӧ
Велӧдліс бур мам.
Дона пиӧй, ло тэ зільӧн,
Дышыд сійӧ — срам.

Пиыс быдмис, лои ыджыд,
Лои бур да шань.
Ставӧн таысь шуам тэныд
Аттьӧ, дона ань.

КОЗИН

Кутшӧм козинсӧ нӧ вайны,
Мӧвпалі ме дыр.

Кута бура велөдчыны,
Медым пятьяс вөлі пыр.

Зіля велөдчөмысь батыө
Шуас аттыө мем,
Мамө ньобас мем выль платтыө,
Новлы, нылө, — тэн.

Дневник тырыс менам пятьяс
Сулалө кыз вөр.
Сыысь ыджыдзык козиныс
Сэсса оз нин төр.

ТӨЛЫСЬ ВЫЛӨ

Вай ми кайлам төлысь вылас,
Сэні олө ныв.
Ва ваялө пельпом вылас,
Оз шу өти кыв.

Сійө өтнас, сылы гажтөм,
Олө коньөр кыз.
Медым шойччас, сійөс вежлам,
Чинас сълөн мудз.

Төлысьвивса мича нылыд
Зэв өд, көнкө, бур.
Отсөг вылад еджыд няньнад
Дерт өд, вердас пыр.

БАЮ-БАЙ

Сбыланкыв тэд сыла вай,
Öввö-öввö, баю-бай.
Ылын съöd вөр шöрын,
Оліс ёма-пöчö вöрын.
Кузь беддöн сійö пыр ветліс,
Кывзысьтöм челядьöс öктіс,
Бурьяссö пö ме ог босьт,
Кывзысьысьсö ме ог корсь.

Мем колöны лёкьяс,
Лёкьяс да шванитчысьяс,
И нуа ылö, ылö вөрö,
Пемыд съöd вөр шөрö.

АКАНЬ ПЛАТТЬÖ

Катя збоя шуö, мем
Вайлö сунис, вайлö ем.
Бура аканьлы ме платтьö,
Сійö шуас меным аттьö.

Платтьö öдйö Катя вурис,
Аканьыслы оз тöр юрас,
Мöд акань сэн кутіс бöрдны,
Выль платтьö жö кутіс корны.

«Кутшöм мича, кутшöм бур,
Мем пö, Катя, тшöтш жö вур».
Катя вурö бара платтьö,
Шуам сылы ыджыд аттьö.

КӨЧ НЯНЬ

Вөрын быдмө уна вотос,
Меным шуис пөч.
Вотос вылас ыджыд пыдди
Сэн пө олө көч.

Коді зіля вотос вотас,
Дозыис лоө тыр.
Зіля уджысь ассьыс няньсө
Көчыд сетас пыр.

ГРАД ЙӨРЫН

Миян бабыдлөн град йөрас,
Потшөс пөлөныс и шөрас,
Мый тэн колө, сійө-й эм.
Өмидз кустыд сәні тшем.

А гөрд өмидзыс сән тыр,
Сейны тырмас миян дыр.
«Өктысьөй пө зіля сідз,
Кытчөдз киясныд оз мудз».

А чөскыд озыйс, градъяс т-ы-р!
Көть доз тыр өкты, оз и быр.
И сэтөрыс съод и гөрд.
Мыйта колө, дозъяд лөд.

Сән өгурцы и помидор.
А бор дорас сән шомкор.
Мыйта быдмө сән морковь.
«Нетшышт, колөкө, эн пов».

ПӨРЫСЬ ДЕДЛЫ

Ыджыд паськыд тош,
Туйыд мед оз вош.
Бөр тэ сәті мун,
Туйыд мед оз вун.

Ветлө сьод вөр шөрын,
Ыджыд зэв, скөр ош,
Верман паныд сюрны,
Ыджыд паськыд тош.

Дедө том дырйиыд
Вына вөвлін зэв.
Ошкөд сувтлін паныд,
Вермывлін пыр тэ.

Өні, пөрысь дедө,
Паныд тэ эн пет.
Кыті ошкыс мунө,
Туйсө сылы сет.

ЗІЛЬ ПИ

Сиктын олө Пашө Миш,
Уджавны пө абу дыш.
Оз пышыы уджсьыд — кыдзи шыш,
Зіля уджысь ва пыр — мыш.
Мишлөн быдмө өтка пи,
Сылөн бать кодь, ён жө, ки.
Топодас кө — чуть оз ви,
Вот пө кутшөм ёнөсь ми.

Батькӧд ветлӧ кыйны кӧч,
Ёна ошкӧ сійӧс пӧч,
Сылысь уджтӧ мӧд оз вӧч:
Быдтор артмӧ сылӧн — стӧч.

А гожӧмын кыйӧ чери:
«Вугыр шатин ачым кери,
Другӧс кыйсьыны со кори,
А кыйӧм чери — юкам шӧри».

Тадзи олӧ Пашӧ Миш,
А сылӧн пиыс — Мишӧ Гриш.
Бать кодъыс жӧ, зэв зиль пи,
Быд удж вӧчӧ сылӧн ки.

«КОМИ КОТЫР»

Ветлӧ сывны челядь чукӧр.
Хорлӧн нимыс «Коми котыр».
Некод оз шу — ме ог мун,
Локны некодлӧн оз вун.
«Коми котыр» быд рыт тыр —
Некор гажӧдчӧм оз быр.
Волӧны сывны, ставлы рад.
Гажа кольӧ рытъя кад.


ВАЖСЯ КОМИ НӨДКЫВЪЯС

- 1) Чань чирөстө, вөв гөрөктө, Ерусалимөдз кылө.
- 2) Гид тыр ыж, да өти бөж.
- 3) Быд керкаын ва кукань дзөрө.
- 4) Быд керкаын эм буржуй.
- 5) Сизим розя гырничтөг некод оз вермы овны.
- 6) Гумла вылын — чань кок туй.
- 7) Сы войтыштө, та войтыштө — некор оз войтышт.
- 8) Керка гөгөр сира гез кыскыссьө.
- 9) Быд керкаын кос сөчөн.
- 10) Би сьөлөма, ва кынөма, зөлөтөй сарафана.
- 11) Кык сись öзйө, кык акань йөктө, нель пышйө, көкъямыс вөтөдө.
- 12) Кык вок орча олөны, а өта-мөдсө эз на аддзывны.
- 13) Ичөтик, ичөтик, а некодос оз лэдз.
- 14) Небесаын эм — му вылын абу, бабыслөн кык, а мамыслөн да нылыслөн — абу.

- 15) Лэччигас сьылө, кайигас бөрдө.
- 16) Китөм и синтөм, а рисуйтчө.
- 17) Кывийыс абу, а быдтор төдө и сёрнитө.
- 18) Кодөс вонас өтчыд мичаа вөччөдөны.
- 19) Пиньыс зэв уна, а немтор оз сөй.
- 20) Ки, ни кок, ни борд абу, а мунө.
- 21) Эм нель кок, а мунны оз вермы.
- 22) Бокө видзөдан, а асьтө аддзан.
- 23) Ачыс омөлик, а юрыс пуд.
- 24) Юрыс муын, а бөжыс вылын.
- 25) Гын шомөсын — яй кольтан.

ВОЧА КЫВЪЯС

- 1) Гымалөм. 2) Пачын нянь и зыр. 3) Мыссян доз. 4) Пач.
- 5) Юр. 6) Гөг. 7) Исерга. 8) Нитш. 9) Паччөр. 10) Самөвар.
- 11) Вөла пу доддя. 12) Син. 13) Томан. 14) Буква «б». 15) Чепня.
- 16) Мороз. 17) Книга. 18) Ёлка. 19) Сынан. 20) Часі. 21) Пызан.
- 22) Рөмпөштан. 23) Мөлөт. 24) Морковь. 25) Валегиын кок.



ЮРИНДАЛЫСЬ

Висьтъяс

Тöлысь вылö	3
Мамлы козин	6
Бинокль	7
Куим чой	9
Букет	11
Сьöд сера кукань	13
Ба-бе-е	16
Вурсьысь	18
Самолёт да морт	19
Катялөн отпуск	20
Кöч нянь	21
Первойя уждон	23
Шыш	25
Öксинь пöч	27
Алёна. Мойдыкы	32

Пьеса

Кывзысьтöм нывкаяс	37
------------------------------	----

Кывбуръяс

Ыджыд аттьö	46
-----------------------	----

Козин	46
Тöльсь вылö	47
Баю-бай	48
Акань платтö	48
Кöч нянь	49
Град йöрын	49
Пöрысь дедлы	50
Зиль пи	50
Коми котыр	51
Важся коми нöдкывъяс	52
Воча кывъяс	53
Юриндальсь	54

**Для детей младшего
школьного возраста**

Литературно-художественное
издание

Зоя Ивановна Рогова

ТРИ СЕСТРЫ

*Рассказы, пьеса, стихи, загадки
На коми языке*

Редактор *А. В. Тентюков*
Художник *Е. А. Мошева*
Художественный редактор *В. В. Осипов*
Технический редактор *А. Н. Вишнева*
Корректор *М. М. Лужикова*

ИБ № 1624

Сдано в набор 22.04.91. Подписано к печати 15.10.91.
Формат 70×90^{1/16}. Бумага № 1. Гарнитура «Новая жур-
нальная». Печать офсетная. Усл. печ. л. 4,1. Усл. кр.-отт.
8,78. Уч.-изд. л. 2,24. Тираж 8000. Заказ № 5958. Цена 40 к.
Коми книжное издательство. 167610, г. Сыктывкар,
ул. Карла Маркса, 229.

Головное предприятие Коми республиканского поли-
графического производственного объединения. 167610,
г. Сыктывкар, ул. Первомайская, 70.



Рогова Зоя Ивановна чужліс 1918 воын Слудка (Придаш) сиктын голь крестьянскöй семьяын. Помаліс педучилище, велодіс сиктса начальнöй школаясын. Бура велөдöмысь 1946 во август тöлысын наградитісны медальöн «За доблестный труд в Великой Отечественной войне 1941—1945 гг.» Бöрынджык уджаліс Сыктывкареса госстрахын. Пенсия вылө петöм бöрын участвуйтö войнаса да уджвывса ветеранъяслöн Сыктывкареса хорын.

Гижö кывбурьяс, висьтыяс, радейтö рисуйтчаны. Тöдö зөв уна важ фольклорнöй коми сьыланкыв, нöдкыв, частушка. Нуөдö коми кыв вылын урокъяс интернатъясын, Вильгорт школаын.